

古愚心言十

善本

上太守卞公祖書

戊午木蘭雅書



鵬少時應進士科三上春官不售荏苒二十餘年伏枥
不自甘若以老孝廉折腰五斗又何足道惟是亂離疾
苦久抱隱痛願藉偕計入長安售則以新進士上書不
售則以布衣上書置疏懷中旦夕伏長安門得一言席
藁爲快乃今老父病矣勢同風燭父子相抱嗚咽淒絕
自遭亂三年餓至骨銷不忍以草莽臣上負

聖明詎生身之親恩斯勤斯呼吸支床而忍絕裾去乎夫
君親大義一也教忠教孝必不使斯世有無父之子查嗣

無可援但以患病未痊呈明與部文註冊之例相符
亦人子也旦夕嘗藥而不斷腸者非人也今者寢不安
食不咽方寸亂矣解帶移孔日就凋竭亦殊非托疾云
爾伏惟鑒詳臨懇激切

歲試上郡太守蘇公祖書

庚申木蘭稿

恭惟開府名家樂城仙品高橋實梓參天樾蔭南閩上
友金昆同日符分三郡讀新師帥教條一道推本老泉
進衆童蒙培植四門拭看狄樹啟者興郡僅轄兩邑蒲
中地瘦人貧惟事誦讀科名較著仙則寥寥寂寂兩邑
人才懸絕今昔同軌矣雖然府學進額仙邑不得入遵
斷案抵寄庄又非僅較人才而已茲當府童蒲童仙童
槩照成規分爲三案由府送道保結綦嚴無敢或紊矣
惟是今歲復額保無乘間譸張生心問鼎者乎老祖臺

泄政方新此案未悉恐臨塲率爾溫陵隔遠不及查例
以進縱學憲至公且明而雌黃多口驟聽生疑此則諸
童所鯁鯁慮也杞人分憂敢爲祖臺一一陳之昔莆人
土田在仙籍貫卽在仙每科歲考得以與試仙邑名曰
寄庄按福州府附郭閩侯二縣糧米在下七縣者得進
七縣學籍貫視土田普天通例也故明莆童進仙庠指
不勝屈舉其寄庄出身者洪武丁丑科至崇禎甲戌科
甲榜則有林榮周瑩楊瓚高昂高江林檣李多見俞誨
朱顯文朱大綬其人者乙榜則有陳禮林越鄭純鄭騫

陳衍楊黻阮韜黃瀟林文幹吳紳陳維孝劉大化吳執
御姚文煒陳承芳陳紳吳日謹陳傑林鳴臯其人者明
經則有林震鄭澄葉茂端李蘆方楨林耕李薦黃泰林
庸林俯陳文汴林賢張欽訓陳應箕曾夢奎曾懋亮周
霖馬顯忠鄭風國王明隆黃起鯤李馮飛陳楠康天陞
蕭鏞其人者當日人文半藉莆才至今得列中學則寄
庄之有光於仙也多矣乃惟古道虛公盡羅莆士土人
弗堪忍倡而攻之莆仙互訐崇禎戊辰年經前文宗樊
鈞批莆陽人文獨盛往例莆人寄庄得以附考仙邑仙

邑新進不得撥入府庠彰其盛也今寄庄不容附考府
庠不容撥入永爲定規是仙之不得入府庠也以莆之
不得與寄庄也斷案至明且悉矣然猶可諉曰前代例
耳乃自 本朝設科以來寄庄未嘗還莆仙童絕無望
蜀由是府案盡收莆才歷歷炳據閱今三十餘年矣此
非監夏監殷之遺意耶康熙八年田文宗與仙紳徐稚
佳同譜同門徐公子纘雍纘師已進仙庠紅案改入府
庠入疑引類漸恐滋蔓莆紳袍卽控前任督撫院禁戢
杜漸防微誠慎之也業批王文宗審報徐紳悔禍呈懇

照舊例歸仙學詳院批允在案則是府學舊例仙紳自言之矣院憲批定之矣其後取結取勘仙邑之人亦嘗譸張爲幻曰前明府學均撥莆僉揭之曰明季科歲考每案九十名計三年內府學進百八十名若果均撥仙邑應得數千人查洪武開科後府學中式七百九十餘名仙人絕無經見府庠可詐科第難誣而均撥之說窮又慮彼覬府庠此取寄庄則曰仙亦有寄米在莆莆僉揭之曰莆米在仙連江里另名莆冬由莆冬寄庄起家列載如前若仙邑在莆升合絕無矣賦役全書可証而

寄米之說窮又曰成均不私於輦轂郡學豈擅之郡城
例應量撥莆僉揭之曰通例縣童撥府視縣分之大小
人才之多寡由來舊矣卽以閩論上而福州府屬下而
泉州府屬僻縣並無撥府他可推已嘗歷覽府志及八
閩科第錄竊謂科甲者人才所自出也查前明仙邑舉
於鄉者四十六人其外十人寄庄則莆產也登進士科
者十人其外六人寄庄則又莆產也莆一邑登解元者
三十二人登賢書者一千九百六七十人登進士榜者
五百二十餘人明景太癸酉一榜同登者一邑四十六

人永樂宣德時戊子壬子京闈閩闈兩科同登解元者
一邑四人嘉靖壬午癸卯閩粵榜同登元魁者一邑十
人登巍科鼎甲者八九人任舉莆中一二姓科名匹敵
仙邑數百年人物卽以 本朝甲乙科論莆田鄉科中
式一百六人甲科二十人仙邑連脫五科寥寥數人甲
科止一人客歲庚申閩省再補鄉試仙邑又脫質諸通
例撥府旣非所宜按以成規寄庄又已相抵而量撥之
說又窮所以此案炳如掌前任府尊今江南撫憲慕及
署府事今潮州守林查勘詳晰矣續蒙前府許勘詳矣

蒙前任督撫院檄取印結節經莆田縣王及前署縣糧廳劉及前縣儒學今禮部司務黃前府儒學今國子助教張各具印結矣又前府許出具印結勘詳至四矣先是王文宗批募府尊詳曰據詳府學歷試仙邑不得撥入今查紅案天啟七年有陳志高一名順治五年有嚴大捷陳思任二名十五年有鄭登第一名皆仙人仰府確查有無定例報時則募府尊勅學確查陳志高日入府學次年崇禎改元莆紳袍公揭經前文宗樊申飭禁戢在案嚴大捷陳思任當順治五年山海寇亂郡城被

陷初復乘機冒入府學順治八年莆紳袍公揭經前文
宗宋申飭在案本年內科歲兩考及順治十一年十三
年文宗孔科歲兩案順治十四年文宗陳歲考歷今五
試府庠從無仙童撥入在案查鄭登第係傅姓冒頂府
童與前嚴昌構冒購倪姓同十五年莆士譚然時登第
黜退後於倒案暗復申飭嚴戢在案十七十八年文宗
宋科歲兩考康熙四年文宗陸七年文宗田科歲並考
從無仙童撥入在案勘詳至悉至前府許出勘且曰若
仙人例有撥府則徐纘雍纘師不必于紅案改入且當

莆人控院控憲時兩造對質豈不能出一詞分訴雍師兄弟爲徐紳佳公子肯俯首自認舊例呈回原學乎事之曲直例之有無亦大彰明較著者也府勘至此仙人無詞矣其年惟許必昌一名冒入係莆紳楊諱夢鯉之婿也衆攻稍息嗣是閩變試停至十八年孫文宗科歲兩考仙童并無撥入在案去冬楊學憲歲考進取悉照府案仙童現無撥入此則近例之可稽者也幸逢老祖臺爲國育材嘉意提調以學憲如鑑如衡當不聞浮言罔左右但自吏胥以下未有不利仙人入府庠彼薦人

者亦然所謂操贏逐末比諸地瘦人貧愛憎固不同耳
若非逐條縷析司衡者萬一面商不詳不備祖臺其何
以爲對故不得不陳者此也向於王孫二文宗披瀝憤
痛不爲勢屈不爲利誘惟欲體功令遵部文勿使人才
頽落以貽文教羞附錄前奏孫文宗書稿呈上覽耿
耿寸衷畧見於此夫當波靡之時尚且嘵嘵不已況今
學憲一代大賢又得老祖臺樂育起衰相與有成不孝
何忍誦金人銘三鍼其口童子案發通國皆修函薦子
弟親屬不孝一無所薦蓋子弟賢自入冰鑑子弟不賢

占多士府額何益耳肅牘而請獨於此事娓娓必有笑
其方而譏其慙者方且慙不孝所以居心而立命也再
查莆田縣學科考優等原額九十名大收錄遺七十名
平海衛學科考優等原額三十名大收錄遺亦三十名
兩學科舉額通計二百二十餘名自客歲衛學奉裁歸
併莆田縣學兩學弟子員將四百人優等錄遺衛額悉
裁去數限人滿向隅必多敢請科舉額照原兩學人數
兩學額數合而擴增觀國之光鼓舞作興必由此伏惟
老祖臺實心大力聞之必請請之必行特無有以是說

復郡太守卞公祖書

已未才蘭稿鸞笑錄介語刻本

先考一布衣耳辱賜吊賜奠至再不孝無德何以戡苦塊中瞢不知其所報日者貴役傳前詳陳某事示以衆紳僉呈并啓禮衰經不敢有言承諭又不敢無言口授幼兒聖壇繕諸稟曰不孝匪違衆也耳目口鼻原無異人而觸之多不忍去年八月以地方困苦已極絲毫不忍偏蔭事具呈區區內自靖爾蒙批尚義急公今日之讀書明道卽異日之民社循良而並及軍興旁午民困云云又及夫坐享膏腴心安云云懸諸郡儀門者三日

自愧又自懼既而大兵駐惠糧料分派各邑獨加徵項
下免派寒袍忝廁諸內經承不肯扣出不孝自辦納票
填本名痛念是年正月至七月曷冬派夫壹拾次助力
凋竭其時泉郡圍急每民米二石五斗派隨征夫一名
催至五兩有奇加以前後派米派穀及派往來差徭諸
色照米取給恒河沙數不孝所不忍者此也曾於納穀
後以照米當差乞杜混冒事呈明前任石令尹批照在
案自今以後謝絕一切料無有以賤名污諸狀者不意
八月寅賓館內突見署縣梁公署席未煖卽辦詳稿爲